



Singapura dan Orang Komunis

Golongan Komunis yang bertujuan hendak merebut kekuasaan di Persekutuan Tanah Melayu, dan sekarang sedang menjadikan Singapura sebagai pangkalannya, telah diberi amaran oleh kerajaan Singapura, supaya bersegera memberhentikan perbuatan mereka yang bodoh itu.

Amaran ini telah dibuat oleh Dr. Toh Chin Chye, Timbalan Perdana Menteri, ketika memberi satu kenyataan rasmi dalam Dewan Perhimpunan Singapura baharu-baharu ini mengenai keselamatan negara.

Orang-orang Komunis – kata Dr. Toh – hendaklah memikirkan apa yang kami telah katakan, dan juga apa yang tidak kami katakan, dan jauhkan diri dari perbuatan bodoh hendak menjadikan Singapura sebagai pangkalan dalam perjuangan mereka untuk merebut kekuasaan di Persekutuan.

Awas Mereka Menyeludup di Kampung-kampung

Dalam suatu kenyataan, Menteri Muda Penerangan Persekutuan Tanah Melayu, Tuan Syed Jaafar Albar, telah mengingatkan supaya rakyat Persekutuan awas dan waspada terhadap orang-orang Komunis yang telah mengubah langkah perjuangan mereka dan sekarang sedang menyeludup di kampung-kampung.

Ketika berucap di Persidangan Perwakilan PAS

Singapura, Dr. Burhanuddin al-Helmy, Yang Dipertua Agung Persatuan Islam Se-Tanah Melayu, telah menegaskan bahawa perpisahan Singapura daripada Persekutuan Tanah Melayu dalam segi politik, sangatlah membahayakan pergerakan kebangsaan Melayu, kerana Singapura ialah hak Melayu.

Mengapa Dimomokkan Islam

Beliau menyatakan, oleh kerana PAS memperjuangkan cita-cita Islam dan hendak menegakkan kedaulatan Islam di tanah air maka timbulah sekarang kata-kata yang memomokkan Islam, kononnya agama tidak boleh dicampurkan dengan politik.

Islam ialah peraturan hidup untuk mencipta kemakmuran dan kesejahteraan, sebagaimana dia menjadi peraturan ibadat yang membawa kebahagiaan di akhirat – kata beliau lagi.

Sosialisme dua mazhab

Dalam persidangan tahunan Parti Rakyat Perak, A.Ibrahim Karim, Yang Dipertua, telah menuduh bahawa dalam Parti Rakyat dan Parti Buruh sekarang sudah ada anasir-anasir yang hendak memecahbelahkan *Socialist Front*.

Tatkala menentang usaha supaya kedua-dua parti itu dibubarkan dan dibentuk satu parti Sosialis yang baharu, beliau berkata:

Bagaimana keduanya boleh disatukan, sedang kita menyebarkan dasar-dasar “*Socio-national Democracy*”, ada pula yang menyebarkan dasar-dasar “*Fabian Socialism*” atau sosialisme Parti Buruh Inggeris?